



Uunga siunnersuut: Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata allangortinneqarnera pillugu Inatsisartut inatsisaat nr. xx, xx. xxx 2018-imeersoq.

(Taarsigassarsianik sioqqutsilluni akiliisarneq)
(Ineqarnermut Angallanermullu Naalakkersuisoq)
(Siullermeernera)

Uani siunnersuut pivarput tungaviusumik pitsaasoq innuttaasunut ataasiakkaanut aamma inuiaqatigiit ataatsimut isigalugit.

Naatsumik oqaatigalugu Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq naapertorlugu innuttaasut taarsigassarsimasut, attartortumiit piginnittumut aaqqissuussineq atorlugu, periarfissinniarneqarput sukkanerusumik taarsigassarsiaminnik taarsiinnaangornissaat. Tamatumap qulakkiissavaa innuttaasut aaqqissuussinermik qanganitsamik nutaamillu atuisimasut assigiimmik pineqarnissaat.

Demokraatini tapersorsorparput innuttaasut akiitsuerutipallakusullutik sukkanerusumik taarsigassarsiaminnik taarsiinnaangornissaat. Aamma paarlattuanik inuiaqatigiinnut pitsaasuvoq atukkiussat siusinaartumik utertinneqartassappata, aningaasat allanut siunertanut atorneqarsinnaangorlugit.

Taamatut oqaaseqarluta siunnersuut ilalerparput innersuullugulu Sanaartornermut Ataatsimiititaliamut.